



Bersama  
Prof Dr Taufiq  
Yap Yun Hin

HARIAN METRO 29/9/2016 p. 35

# Hanya Yang Maha Esa kekal selamanya

Tidak seperti kepercayaan lain di dunia ini, Islam tidak mengambil nama sempena nama pengasasnya atau komuniti awalnya. Islam adalah nama yang menunjukkan ketaatan kepada Tuhan iaitu Pencipta seluruh alam semesta ini.

Satu daripada keindahan Islam ialah mengakui kesempurnaan, kebesaran dan keesaan Tuhan tanpa tandingan dengan apa sekalipun. Islam mengajar manusia mengenai sifat Tuhan. Segala benda yang ada semuanya adalah ciptaan Tuhan.

Tuhan adalah kekal, sebaliknya makhluk tidak kekal iaitu akan musnah dan hancur apabila tiba waktunya.

Hanya satu Tuhan. Tidak kira bangsa, keturunan dan kedudukan di timur atau barat, Allah adalah Tuhan bagi seluruh manusia.

Firman-Nya bermaksud: "Bacalah ( wahai Muhammad) dengan nama Tuhanmu yang menciptakan (sekalian makhluk). Dia menciptakan manusia daripada sebuku darah buku." (Surah al-Alaq, ayat 1 dan 2)



**GUNUNG-GANANG** yang menjadi pasak bumi akan musnah jua satu hari nanti.

Allah tidak menyamai dengan sesuatu yang baru dan tiada tandingan. Firman-Nya dalam surah **as-Syura, ayat 11** bermaksud: "...tiada sesuatu pun yang sebanding dengan-Nya dan Dialah Yang Maha Mendengar lagi Maha Melihat."

Dia tidak mempunyai sekutu, tiada bapa, ibu, anak lelaki atau perempuan dan tiada isteri. Allah tidak memerlukan

semua itu kerana Dia boleh berdiri dengan sendirinya. "Katakanlah ( wahai Muhammad): (Tuanku) ialah Allah Yang Maha Esa. Allah yang menjadi tumpuan sekalian makhluk untuk memohon sebarang hajat. Dia tiada beranak dan tidak diperanakkan. Dan tidak ada sesiapa pun yang setara dengan-Nya." (Surah al-Ikhlas, ayat 1 hingga 4)

Dia sajalah yang layak

disembah dan menerima segala sembahannya. Dia Maha Mengetahui, Maha Besar dan Maha Sempurna. Dia tidak mempunyai batasan seperti manusia yang memerlukan tidur, makan, minum dan rehat.

"Allah, tiada tuhan (yang berhak disembah) melainkan Dia, Yang Tetap Hidup, Yang Kekal selama-lamanya mentadbirkan (sekalian makhluk-Nya). Yang tidak mengantuk usahkan tidur.

Yang memiliki segala yang ada di langit dan yang ada di bumi.

"Tiada sesiapa yang dapat memberi syafaat (pertolongan) di sisi-Nya melainkan dengan izin-Nya. Yang mengetahui apa yang ada di hadapan mereka dan apa yang di belakang mereka, sedang mereka tidak mengetahui sesuatu pun daripada (kandungan) ilmu Allah melainkan apa yang Allah kehendaki (memberitahu

kepadanya)..." (Surah al-Baqarah, ayat 255)

Dalam kita mentaati-Nya, janganlah kita menyangka amal perbuatan dilakukan untuk memberi faedah kepada-Nya.

Amal kebaikan yang kita usahakan untuk faedah diri kita sebagaimana firman-Nya bermaksud: "Jika kamu berbuat kebaikan, (maka faedah) kebaikan yang kamu lakukan adalah untuk diri kamu..." (Surah al-Isra, ayat 7)

Tuhan Maha Kaya. Dia tidak berhajat kepada sesiapa, sebaliknya kita yang berhajat kepada-Nya. Justeru, dalam kita sentiasa berhajat kepada-Nya adalah sangat rugi jika mengingkari perintah-Nya.

Firman-Nya bermaksud: "(Oleh kerana Allah menguasai segala-galanya, maka) wahai umat manusia, kamulah yang sentiasa berhajat kepada Allah (dalam segala perkara), sedang Allah Dialah sahaja Yang Maha Kaya, lagi Maha Terpuji." (Surah Faatir, ayat 15)

**Penulis ialah Presiden Persatuan Cina Muslim Malaysia (MACMA) dan profesor di UPM**